



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-2026-1/09
Sarajevo, 20.7.2009. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 20.7.2009.			
Organizaciona jedinica	Klasifikaciona oznaka	Redni broj	Broj priloga
01-50-1-15-55		09	

PARLAMENTARNA SKUPŠTINA BiH
- Zastupnički dom -

SARAJEVO

PREDMET: Odgovori na pitanja zamjenika predsjedatelja
Zastupničkog doma Parlamentarne skupštine BiH

Vijeće ministara Bosne i Hercegovine, na 94. sjednici održanoj 16.7.2009. godine, utvrdilo je odgovore na dva pitanja koja je gosp. Milorad Živković, zamjenik predsjedatelja Zastupničkog doma Parlamentarne skupštine Bosne i Hercegovine, postavio na 55. sjednici ovog doma održanoj 16.6.2009. godine.

U privitku proslijeđujemo odgovore radi njegovog dostavljanja gosp. Živkoviću.

S poštovanjem,



GENERALNI TAJNIK
Zvonimir Kutleša



BOSNA I HERCEGOVINA

VIJEĆE MINISTARA

Broj: 05-50-2026/09

Sarajevo, 16.7.2009. godine

Milorad Živković, zamjenik Predsjedavajućeg Predstavničkog doma Parlamentarne skupštine Bosne i Hercegovine, na 55. sjednici Predstavničkog doma održanoj 16.06.2009. godine, postavio je sljedeće pitanje:

„ Da li je legalno i ako jeste, na osnovu kojeg ugovora ili zakona, prisluškivanje građana, zvaničnika institucija u BiH od strane, pod navodnicima međunarodnih obavještajnih organizacija, koje su to organizacije i ko ih finansira?“

Na postavljeno pitanje, Vijeće ministara Bosne i Hercegovine je na 94. sjednici održanoj 16.7.2009. godine, utvrdilo sljedeći

ODGOVOR

Prisluškivanje građana, zvaničnih institucija u BiH, od strane „međunarodnih obavještajnih organizacija“ (formulacija iz pitanja) NIJE LEGALNO, niti može biti predmet međunarodnog ugovora koji je zaključila država BiH. Krivični zakon BiH je propisao krivično djelo špijunaže (čl.163) i kaznu za izvršenje tog djela. Takođe, Krivični zakon BiH propisao je odgovornost za krivična djela koja počinje domaće i strane pravne osobe na teritoriji BiH. Članom 5. stav 1. Zakona o obavještajno-sigurnosnoj agenciji Bosne i Hercegovine propisano je:

„ Agencija je odgovorna za prikupljanje obavještajnih podataka u vezi sa prijetnjama pa sigurnost BiH kako unutar tako i van BiH, njihovo analiziranje i prenošenje ovlaštenim zvaničnicima i tijelima navedenim u članu 6. stav 5. ovog zakona,...”

„Pod prijetnjama po sigurnost Bosne i Hercegovine” smatra se:”špijunaža usmjerena protiv BiH ili štetna po sigurnost BiH na bilo koji drugi način;”(član 5. stav 2b)

Agencija ima pravo koristiti operativna sredstva i metode navedene u poglavlju VIII i IX ovog zakona u izvršavanju navedenih aktivnosti. Za više informacija o postavljenom pitanju zamjenik Predsjedavajućeg Predstavničkog doma Parlamentarne skupštine može se direktno obratiti OSA BiH jer spada u osobe iz člana 6. stav 5.



BOSNA I HERCEGOVINA

VIJEĆE MINISTARA

Broj: 05-50-2026-1/09

Sarajevo, 16. 7. 2009. godine

Milorad Živković, zamjenik Predsjedavajućeg Predstavničkog doma Parlamentarne skupštine Bosne i Hercegovine, na 55. sjednici Predstavničkog doma održanoj 16.06.2009. godine postavio je sljedeće pitanje:

„Da li je Savjet ministara BiH zadužio ministra bezbjednosti Tarika Sadovića da otputuje u Lion i sastane se sa generalnim sekretarom Interpol, gospodinom Ronaldom Noblom i razgovara u ime BiH o raspisivanju i dostavljanju potjernica u slučaju Dobrovoljačka? Koga je i na osnovu koje platforme ministar Sadović predstavljao u Lionu i čije je interese zastupao i da li su o njegovim istupima, putovanjima i jednostranim lobiranjima upoznati predsjedavajući Savjeta ministara, njegovi zamjenici, zamjenik ministra bezbjednosti i Kancelarija Interpol u BiH?“

Na postavljeno pitanje, Vijeće ministara Bosne i Hercegovine je na 94. sjednici održanoj 16.7.2009. godine, utvrdilo sljedeći

ODGOVOR

U članu 14. stav 1. alineja 3. Zakona o ministarstvima i drugom tijelima uprave Bosne i Hercegovine propisano je da je Ministarstvo sigurnosti nadležno za „međunarodnu saradnju u svim oblastima iz nadležnosti Ministarstva“. NCB Interpol – Sarajevo je član međunarodne organizacije kriminalističke policije (INTERPOL) i djeluje kao Služba u sastavu Ministarstva sigurnosti. U svom radu države članice Interpol postupaju u skladu sa Statutom Interpol, Pravilnikom o procesuiranju informacija i drugim aktima.

Sastanak ministra sigurnosti sa generalnim sekretarom Interpola Ronaldom Nobleom koji je održan 02.06.2009. godine u Lionu dio je redovnih obaveza i odgovornosti ministra u čijoj je nadležnosti međunarodna policijska saradnja. Jedna od tema sastanka bilo je paralelno vođenje krivičnih postupaka u Bosni i Hercegovini i Republici Srbiji u slučaju tzv. Dobrovoljačka ulica u Sarajevu i zahtjevi srbijanskog Interpola za raspisivanje difuznih i crvenih potjernica za državljanima Bosne i Hercegovine koji su navodno počinili krivično djelo ratnog zločina na teritoriji Bosne i Hercegovine. U slučaju „Dobrovoljačka ulica“ Tužilaštvo Bosne i Hercegovine je još 2006. godine pokrenulo krivični postupak, odnosno zvaničnu istragu. Ministarstvo pravde BiH je aktom broj: 01-50-16/09 od 11.03.2009. i 20.05.2009. godine zatražilo od Ministarstva pravde Srbije da se ustupi krivični postupak u tom predmetu nadležnim organima BiH u skladu sa Ugovorom između BiH i Srbije o pružanju pravne pomoći u građanskim i krivičnim stvarima kao i sa Evropskom konvencijom o pravnoj pomoći u krivičnim stvarima koja obavezuje obje države.

Takođe, Tužilaštvo BiH je dana 20.05.2009. godine aktom broj A-372/09 od Tužilaštva za ratne zločine Republike Srbije zatražilo da obustavi istragu koju su započeli i da postupak u ovoj stvari prenesu na Tužilaštvo BiH, kako je i predviđeno članovima 33. i 34. Evropske konvencije o prenošenju postupka u krivičnim stvarima, s obzirom da je Bosna i Hercegovina pravo i jedino mjesto gdje se treba voditi krivični postupak. Ministarstvo pravde BiH proslijedilo je akt 01.06.2009. godine Ministarstvu pravde Srbije. Za istragu vezanu za „Dobrovoljačku ulicu“ svoje mišljenje, u skladu sa Rimskim pravilima puta dao je Međunarodni krivični sud za ratne zločine za područje bivše Jugoslavije – Tribunal u Hagu; vratio je spis vlastima BiH pod oznakom B - da ima osnova da se istraga nastavi. Rimska pravila su dokument koji su 1996. godine potpisali predsjednici BiH, Srbije i Hrvatske sa ciljem da se izbjegnu tajni nalozi za hapšenje i vođenje paralelnih krivičnih postupaka, te je bilo neophodno odobrenje Haškog tribunala. Haški tribunal dao je odobrenje pravosudnim organima BiH da vode postupak po ovom predmetu. Republika Srbija, iako potpisnica Sporazuma (Pravila puta), nikada nije tražila odobrenje od Haškog tribunala nego je i pored svih zahtjeva od strane vlasti BiH podnijela zahtjev za raspisivanje međunarodnih potjernica. Pravni odjel Interpola izvršit će reviziju ovog predmeta.

Ministar sigurnosti je dan uoči odlaska u Lion održao sastanak sa Glavnim tužiocem BiH, Predsjednicom suda BiH, Ministrom pravde BiH i zamjenikom direktora NCB Interpola – Sarajevo na kojem je jednoglasno potvrđen stav da je za procesuiranje osoba u slučaju Dobrovoljačka nadležno Tužilaštvo BiH, jer se navodno krivično djelo desilo na teritoriji BiH i osumnjičeni su državljani BiH. Ministar je obavijestio prisutne da će ići na sastanak sa generalnim sekretarom Interpola.